



4613451907265

www.info.court.ge

გ ა ნ ჩ ი ნ ე ბ ა

საქართველოს სახელით

სარჩელის დაუშვებლობის გამო საქმის წარმოების შეწყვეტის შესახებ

საქმე №3/6054-17

22 ოქტომბერი, 2018 წელი

ქ. თბილისი

თბილისის საქალაქო სასამართლოს ადმინისტრაციულ საქმეთა კოლეგია

მოსამართლე ანა ჩხეტია

სხდომის მდივანი მამუკა გიორგანაშვილი

განხილვის ფორმა - ღია სასამართლო სხდომა

მოსარჩელე - შოთა ბუჩუკური

მოპასუხეები - სსიპ ტექნიკური და სამშენებლო ზედამხედველობის სააგენტო, საქართველოს ეკონომიკისა და მდგრადი განვითარების სამინისტრო

მესამე პირი - გარემოს დაცვისა და სოფლის მეურნეობის სამინისტრო, შპს „ენერგოტრანსი“

დავის საგანი - ადმინისტრაციულ-სამართლებრივი აქტების ბათილად ცნობა

სასამართლომ

გ ა მ ო ა რ კ ვ ი ა :

2017 წლის 4 სექტემბერს თბილისის საქალაქო სასამართლოს ადმინისტრაციულ საქმეთა კოლეგიაში შოთა ბუჩუკურმა სსიპ ტექნიკური და სამშენებლო ზედამხედველობის სააგენტოსა და საქართველოს ეკონომიკისა და მდგრადი განვითარების სამინისტროს მიმართ წარმოადგინა სარჩელი, რომლითაც მოითხოვა:

1. ბათილად იქნეს ცნობილი სსიპ ტექნიკური და სამშენებლო ზედამხედველობის სააგენტოს 2016 წლის 23 მარტის №54-04 ბრძანება, რომლითაც დამტკიცდა „ქსნის“ ქვესადგურიდან დუშეთის მინიციპალიტეტის სოფელ ოქრუაანამდე 500 კვ ელექტროადამცემი ხაზი „ქსანი-სტაფანწმინდას“ პროექტისათვის მიწის ნაკვეთის სამშენებლოდ გამოყენების პირობები;

2. ბათილად იქნეს ცნობილი სსიპ ტექნიკური და სამშენებლო ზედამხედველობის სააგენტოს 2016 წლის 19 ივლისის №121-04 ბრძანება, რომლითაც შეთანხმებულ იქნა „ქსნის“ ქვესადგურიდან დუშეთის მინიციპალიტეტის სოფელ ოქრუაანამდე 500 კვ ელექტროადამცემი ხაზი „ქსანი-სტაფანწმინდას“ კონსტრუქციული და ტექნოლოგიური სქემები;

3. ბათილად იქნეს ცნობილი სსიპ ტექნიკური და სამშენებლო ზედამხედველობის სააგენტოს 2016 წლის 7 ოქტომბრის №179-04 ბრძანება, რომლითაც დამტკიცდა დუშეთის მუნიციპალიტეტის სოფელ ოქრუაანიდან ყაზბეგის მუნიციპალიტეტის სოფელ

აჩხოტამდე „ქსანი-სტეფანწმინდას“ 500 კვ ელექტროგადამცემი ხაზის მეორე მონაკვეთის პროექტისატვის მიწის ნაკვეთის სამშენებლოდ გამოყენების პირობები;

4. ბათილად იქნეს ცნობილი სსიპ ტექნიკური და სამშენებლო ზედამხედველობის სააგენტოს 2016 წლის 1 დეკემბრის №204-04 ბრძანება, რომლითაც შეთანხმებულ იქნა დუშეთის მუნიციპალიტეტის სოფელ ოქრუაანიდან ყაზბეგის მუნიციპალიტეტის სოფელ აჩხოტამდე „ქსანი-სტეფანწმინდას“ 500 კვ ელექტროგადამცემი ხაზის მეორე მონაკვეთის კონსტრუქციული და ტექნოლოგიური სქემები;

5. ბათილად იქნეს ცნობილი ზემოაღნიშნულ აქტებზე წარდგენილი ადმინისტრაციული საჩივრის დაკმაყოფილებაზე საქართველოს ეკონომიკისა და მდგრადი განვითარების სამინისტროს უარი.

თბილისის საქალაქო სასამართლოს ადმინისტრაციულ საქმეთა კოლეგიის 2017 წლის 8 სექტემბრის განჩინებით სასამართლომ სარჩელი წარმოებაში მიიღო და მოცემულ ეტაპზე დასაშვებად ცნო.

2018 წლის 4 ივნისის სხდომაზე მოპასუხე სსიპ ტექნიკური და სამშენებლო ზედამხედველობის სააგენტოს წარმომადგენელმა წარმოადგინა სსიპ ტექნიკური და სამშენებლო ზედამხედველობის სააგენტოს 2018 წლის 26 იანვრის N11-04 და 2018 წლის 30 მარტის N46-04 ბრძანებები, რომლებითაც დუშეთის მუნიციპალიტეტის სოფელ ოქრუაანიდან ყაზბეგის მუნიციპალიტეტის სოფელ აჩხოტამდე „ქსანი-სტეფანწმინდას“ 500 კვ ელექტროგადამცემი ხაზის მეორე მონაკვეთის ცვლილებაზე (დუშეთის მუნიციპალიტეტის 12 კმ-იან შეცვლილი შემოვლითი მონაკვეთი) მიწის ნაკვეთის სამშენებლოდ გამოყენების პირობები დამტკიცდა, კონსტრუქციული სქემა შეთანხმდა და მშენებლობის ნებართვა გაიცა.

2018 წლის 17 ოქტომბერს სასამართლოს წარედგინა შოთა ბუჩუკურის დაზუსტებული სარჩელი, რომლითაც თავდაპირველ სარჩელში ასახულ მოთხოვნებთან ერთად მოთხოვნილ იქნა სსიპ ტექნიკური და სამშენებლო ზედამხედველობის სააგენტოს 2018 წლის 26 იანვრის N11-04 და 2018 წლის 30 მარტის N46-04 ბრძანებების ბათილად ცნობა.

სასამართლომ მოისმინა რა მხარეთა ახსნა-განმარტებები, შეაფასა საქმეში არსებული მტკიცებულებები, მიიჩნევს, რომ სარჩელზე სსიპ ტექნიკური და სამშენებლო ზედამხედველობის სააგენტოს 2016 წლის 7 ოქტომბრის №179-04 ბრძანებისა და 2016 წლის 1 დეკემბრის №204-04 ბრძანების, ასევე, მათზე წარდგენილი ადმინისტრაციული საჩივრის დაკმაყოფილებაზე უარის ბათილად ცნობის მოთხოვნის ნაწილში საქმის წარმოება უნდა შეწყდეს მისი დაუშვებლობის მოტივით შემდეგ გარემოებათა გამო:

საქართველოს ადმინისტრაციული საპროცესო კოდექსის 22-ე მუხლის მე-2 ნაწილის მიხედვით, თუ კანონით სხვა რამ არ არის დადგენილი, სარჩელი ადმინისტრაციულ-სამართლებრივი აქტის ბათილად ცნობის თაობაზე დასაშვებია, თუ ადმინისტრაციულ-სამართლებრივი აქტი ან მისი ნაწილი პირდაპირ და უშუალო ზიანს (ინდივიდუალურ) აყენებს მოსარჩელის კანონიერ უფლებას ან ინტერესს ან უკანონოდ ზღუდავს მის უფლებას.

მოცემულ შემთხვევაში განსახილველ საქმის მასალებით დგინდება, რომ სარჩელით გასაჩივრებული აქტებით - სსიპ ტექნიკური და სამშენებლო ზედამხედველობის სააგენტოს 2016 წლის 7 ოქტომბრის №179-04 ბრძანებითა და 2016 წლის 1 დეკემბრის №204-04 ბრძანებით დუშეთის მუნიციპალიტეტის სოფელ ოქრუაანიდან ყაზბეგის

მუნიციპალიტეტის სოფელ ახოტამდე „ქსანი-სტეფანწმინდას“ 500 კვ ელექტროგადამცემი ხაზის მეორე მონაკვეთზე დამკვიცებული სამშენებლოდ გამოყენები პირობები და შეთანხმებული კონსტრუქციული და ტექნოლოგიური სქემები დუშეთის მუნიციპალიტეტის 12 კმ-იან მონაკვეთზე შეცვლილია და ცვლილება დამტკიცებულია სსიპ ტექნიკური და სამშენებლო ზედამხედველობის სააგენტოს 2018 წლის 26 იანვრის N11-04 და 2018 წლის 30 მარტის N46-04 ბრძანებებით. ამდენად, ცვლილების ნაწილში სსიპ ტექნიკური და სამშენებლო ზედამხედველობის სააგენტოს 2016 წლის 7 ოქტომბრის №179-04 ბრძანება და 2016 წლის 1 დეკემბრის №204-04 ბრძანება აღარ აყენებს სადავო შედეგს.

ამასთან, საქმის მასალებით არ ირკვევა, რომ სსიპ ტექნიკური და სამშენებლო ზედამხედველობის სააგენტოს 2016 წლის 7 ოქტომბრის №179-04 ბრძანება და 2016 წლის 1 დეკემბრის №204-04 ბრძანება მოსარჩელეს პირდაპირ და უშუალო ზიანს აყენებს. მოსარჩელისა და მისი წარმომადგენლების განმარტებით, მითითებული აქტების მოქმედება მოსარჩელისათვის ზიანის მომტანია, ვინაიდან მათ შესაბამისად 500 კვ ელექტროგადამცემი ხაზის მშენებლობის პროექტის განხორციელება განაპირობებს ელექტროგადამცემი ხაზის გავლას მოსარჩელის კუთვნილ საცხოვრებელ სახლთან, რომელიც მდებარეობს სოფელ ახალციხეში. საქმის მასალების მიხედვით, მოსარჩელე შოთა ბუჩუკური ცხოვრობს თბილისში, სოფელ ახალციხეში ქონების მფლობელობასა თუ საკუთრებასთან, ასევე, ქონების ზუსტ ადგილმდებარეობასთან დაკავშირებით მტკიცებულებები კი წარმოდგენილი არ ყოფილა.

ადმინისტრაციული საპროცესო კოდექსის 26²-ე მუხლის მე-2 ნაწილის მიხედვით, სასამართლო განჩინებით შეწყვეტს საქმის წარმოებას, თუ იგი არ აკმაყოფილებს ამ კოდექსის 22-ე–25-ე მუხლებით დადგენილ დასაშვებობის მოთხოვნებს. პირველი ინსტანციის სასამართლოში საქმის განხილვისას სასამართლო აღნიშნული საფუძვლით წყვეტს საქმის წარმოებას პროცესის ნებისმიერ სტადიაზე.

ყოველივე ზემოაღნიშნულიდან გამომდინარე, სასამართლომ იხელმძღვანელა საქართველოს ადმინისტრაციული საპროცესო კოდექსის პირველი, მე-2, 22-ე, 26²-ე, საქართველოს სამოქალაქო საპროცესო კოდექსის 284-ე, 285-ე, 414-ე-416-ე, მუხლებით და

და ა დ გ ი ნ ა:

1. შოთა ბუჩუკურის სარჩელზე სსიპ ტექნიკური და სამშენებლო ზედამხედველობის სააგენტოს 2016 წლის 7 ოქტომბრის №179-04 ბრძანებისა და 2016 წლის 1 დეკემბრის №204-04 ბრძანების, ასევე, მათზე წარდგენილი ადმინისტრაციული საჩივრის დაკმაყოფილებაზე უარის ბათილად ცნობის მოთხოვნის ნაწილში შეწყდეს საქმის წარმოება სარჩელის დაუშვებლობის გამო;

2. განჩინება შეიძლება გასაჩივრდეს მისი მხარისათვის ჩაბარებიდან 12 დღის ვადაში თბილისის სააპელაციო სასამართლოს ადმინისტრაციულ საქმეთა პალატაში (მდებარე თბილისში, გრ. რობაქიძის გამზ. №7ა) თბილისის საქალაქო სასამართლოს ადმინისტრაციულ საქმეთა კოლეგიაში (მდებარე ქ. თბილისში, დ. აღმაშენებლის ხეივანი მე-12 კმ. №6) კერძო საჩივრის წარდგენის გზით.